




1070. L. 12

SVR LES LO-  
VANGES, MALADIE ET  
GVERISON, DE TRESHAVT, TRES-  
PVISSANT ET TRESVERTVEUX

*Seigneur, Messire GEORGE DE VILLIERS,  
Compte Marquis & Duc de Buckingham,  
Grand Admiral & Grand Escuyer du Roy  
d'Angleterre :*

Ode,

PAR IEAN D'ALARY *Aduo-  
cat au Parlement de Thoulouse, Auteur de l'abregué  
des longues Esteudes, monstrant dans peu de temps les  
deux perfections du scauoir, qui consistent a discourir  
des plus beaux suiets, & abien coucher par escrit  
& a faire des Oewres, par l'inuention de  
son Art, qui la constrainct de quit-  
ter la France et ses biens, par  
l'Enuie et la Calumnie  
des Iesuites.*



(I)



Ode.

**C**ombien que mon Art uray mesprise  
Celluy des vers, comme menteur,  
En relleuant mon entreprise  
A former un grand Orateur :  
Buckingham, vostre renommée  
Des mains de la vertu semée,  
Aux quatre endroiets de l'univers,  
M'attire aux filles de Memoire,  
Pour changer la fable des vers,  
En vostre veritable gloire.

Si vostre los ne les assure,  
On les croira mal assurés,  
Pour donner des vers mesurez,  
A vos merites sans mesure :  
Et encore ces vers nombreux,  
Ne scauroint pas comprendre en eux,  
Vos Vertus sans nombre, & leur vaine,  
Pour couler d'un style plus dous,  
Vouldroint auoir de Melpomene,  
La douceur qu'ils louent en vous :

Mais c'est eux, qui font que nous sommes,  
Pareils a la Diuinité :

(4)

Et qui donnent aux plus grands hommes,  
Le pris de l'Immortalité :  
C'est d'eux qu'Apollon environne  
Les fronts, que la gloire couronne,  
L'honneur est confit dans leur miel,  
Ils vont annoblissant les races,  
Et coulent des graces du Ciel,  
Et ceux cy du Ciel de vos graces.

La seule vertu qui rassemble,  
En vous la gloire et le bonheur,  
Vous acquiert beaucoup plus d'honneur,  
Que ne font vos honneurs ensemble.  
Ce sont des presens d'un grand Roy;  
Pour le loyer de vostre Foy,  
Et n'auès par ses benefices,  
Tant d'honneurs en vous ramassés;  
Que de gloire par vos seruices,  
Qu'on ne scauroit louer assés :

D'auoir la ~~face~~ grace en l'ame escrete,  
Et toutes les perfections,  
Pour mieux posseder le merite,  
C'est le but de vos actions :  
Vostre Esprit ne scait faire hommage,  
Qu'aux vertus, dont il est l'image,  
Car vous logès, estant vainqueur,  
Des passions filles du blasme,  
Et l'humanité dans le cœur,

(5)

*Et la diuinité dans l'ame:*

*Vostre ame n'est rien que sagesse,  
Vostre Esprit que diuinité,  
Vostre coeur que benignité,  
Ny vostre main rien que largesse:  
Ceux qui vont goustant les douceurs,  
De diuin mestier des neuf Sœurs,  
Lors que leur Muse vous estraine,  
Ont de vous tresor pour tresor,  
Changeant leur fleuve d'Hypocrene,  
En vn Pactole et fleuve d'or:*

*L'honneur qui de sa sainte flame,  
Eprit vostre coeur genereux,  
Vous a rendu l'ame de l'ame,  
D'un Roy scauant & valeureux:  
Tout ce que son desir commende,  
Vostre volonté le demende,  
Et tous deux pour vn seul contés,  
Il ne peut en ce qu'il aspire,  
Desirer que vos volontés,  
Car vous voulés ce qu'il desire:*

*C'est la fleur de vostre esperence,  
C'est le fruit de vostre desir.  
C'est le Ciel de vostre plaisir,  
C'est l'ancre de vostre asseurance;  
C'est le Temple de vos honneurs  
C'est l'Estoille de vos bonheurs,*

Cest le Soleil qui vous en flame,  
 Et vos yeux n'aians d'autre iour,  
 L'amour seroit plustost sans ame,  
 Que vostre ame sans son amour.

Son amitié si fort empraincte  
 Dans vostre ame, en toute candeur,  
 Ne se nourrit que de la crainte,  
 Et du respect de sa grandeur :  
 Ce qui la rend plus assurée,  
 Car elle est si bien mesurée,  
 Aux loix de la discretion,  
 Qu'elle n'employe sa puissance,  
 Avec une humble affection,  
 Que pour luy rendre obeyssence.

Plusieurs ayment plus la Couronne,  
 Et le sceptre d'un puissant Roy,  
 Ayans l'ambition pour loy,  
 Qu'ils ne cherissent sa personne :  
 Vous un Phœnix en loyauté,  
 N'aymés pas tant sa royauté,  
 Que son grand Esprit, qu'on remarque,  
 N'auoir i'amaïs eu de vainqueur,  
 Et quand il ne seroit Monarque,  
 Il le seroit de vostre Cœur.

Vous ne pouués seruir le Pere,  
 D'un los eternal reuestu,  
 Sans aymer le fils, qu'on espere



(7)

Estre heritier de sa vertu :  
Bien que vous seruiés dauantage  
Le Pere, son amour partage,  
L'ardent coeur de vostre amitié,  
Car leurs moeurs & humeurs esgalles,  
Vous en faiët donner la moitié,  
A son fils, Le Prince de Galles.

C'est amour qui vous sert de vie,  
Doibt durer malgré le trespas,  
Estant si fort, qu'il ne doibt pas  
Ceder au combat de l'enuie :  
La malice avec tout son fiel,  
A beau courir ce diuin Ciel,  
Des noirs nuages du mensonge,  
Le iour de vostre integrité,  
Les dissipe comme un faux songe,  
Des rays de de sa fidelité :

Ceux qui voudroint de l'Angleterre,  
Qu'ils redoubtent pour ses valeurs,  
Croistre les bornes de leur Terre,  
Qui doibt s'acroistre un iour des leurs :  
Quoy que leur lascheté se vante,  
Vostre grand Coeur les espouuente,  
C'est l'ancre pour les accrocher,  
Vostre prudence est leur orage,  
Et vostre conseil, le rocher,  
Ou ils doibuent faire naufrage.

Le

Le venin de leur perfidie,  
 En infectant d'un faux rapport  
 Le Roy, vostre ame & cher support,  
 A causé vostre maladie :  
 Mais vous l'Astre de leur malheur,  
 Leur influés plus de douleur,  
 Car s'ils vous ont donné la fièvre,  
 Vostre nom honorablement,  
 Enfente dans ces coeurs de Lieure,  
 La fiebure d'un grand tremblement :

Ils craignent que leurs Tyrannies,  
 Ne recoiuent le frein des loix,  
 Des mains de vos forces unies,  
 Avec l'audace des Anglois :  
 Qu'ils ne rendent a leurs espès,  
 Les places qu'ils ont usurpès,  
 Bien que leur orgueil s'obstinat,  
 Du fiel de l'Iniustice mesme,  
 D'occuper le Palatinat,  
 Et le Royaume de Boheme :

Ils redoubtent que la tempeste  
 Du vent, que leur bouche a donné,  
 D'un vengeur fouldre enuironné,  
 Ne vienne a fondre sur leur teste :  
 Que ce vent guide les vaisseaux  
 Des Anglois, pour mettre a mourceaux  
 Les leurs, de leur ire allumée,

Contre



Contre un autre Iacomodon,  
 Payant ce vendeur de fumée,  
 De l'esclat fumeux du Canon :

Vous acquerés c'est aduantage,  
 De ces Enuieux combatu,  
 Que leur hayne acroist dauantage,  
 L'estime de vostre vertu :

Les grandes vertus sont suiuies,  
 De l'ombre des grandes enuies,  
 Vostre los qui les faict pecher,  
 Faict bien cognoistre leur manie,  
 Mais il ne peut pas empescher,  
 La poison de leur Calomnie :

Ce Prince qui n'est que prudence,  
 Et qui pese tout sagement,  
 Pour ne donner son iugement,  
 Aux regrets de la repentence,  
 Cognoist bien d'un esprit royal,  
 Que vous luy estes tresloyal,  
 Et que ces Renards de cautelle,  
 (Afin qu'il n'en recouure un tel)  
 Voudroint par leur hayne mortelle,  
 Perdre c'est amour immortel :

Aussy remply de fascherie,  
 De le croire si hors de soy,  
 Qu'il creust plus a leur tromperie,  
 Qu'il ne croist pas a vostre foy :

Comme un Astre d'heureux presage,  
 Il vous a veu d'un doux visage,  
 Qui cachoit son affliction,  
 Vous donnant en son dueil extrême,  
 La douce consolation,

Dont il auoit besoing luy-même :

O que la fiebure et la detresse,

Qui vous agitoit de ses flots,

Agita sa voix de sanglots,

Et fendit son coeur de tristesse :

Vostre mal l'eust mis au Cercueil,

Et l'eust enterré dans son dueil,

N'estoit que ce diuin Monarque,

(Dont le los est au Ciel escrit,)

Est exempt des loix de la Parque,

A cause qu'il n'est rien qu'Esprit.

Vous aués treuue le remede

De vos douleurs, dans les discords,

Le bien que vostre ame possede,

Chassant le mal de vostre Corps :

Non: le Roy & vostre amour sainte,

Semble changer ce mal en faincte,

Vostre Coeur loge dans son sein,

Qui faiët que le sens persuade,

Que puis que ce Prince estoit sain,

Vous ne pouuies estre malade :

Vués doncques malgré l'Enuie,

(11)

*Auec tant de contentement,  
Qu'elle ayt pour immortel tourment,  
L'heur de vostre immortelle vie :  
Viues pour le Roy, vostre apuy,  
Qui vit en vous, et vous en luy,  
Viues pour toute l'Angleterre,  
Sans estre iamais abatu,  
Et pour l'Honneur, qui vit en terre  
Par l'ame de vostre Vertu.*

---

Audict Seigneur  
SONNET.

**G**Rand Duc, grand de fortune, et plus grand de prudēce,  
Le ne scay si ie doibs, plus louer le bonheur,  
Qui vous rend reluisant de richesse et d'honneur,  
Que la Vertu qui faiēt en vous sa residence :  
Mais non : c'est la Vertu, avec plus d'euidence,  
Qui vous a sagement choisi pour Gouverneur,  
Le merite infini, de vos biens le donneur,  
Les vous faiēt meriter en plus grand' abondence :  
La Fortune est meuable, et a son appetit,  
Faiēt d'un petit vn grand, et d'un grand vn petit,  
Elle ourdit le bonheur, et en coupe la trame :  
Mais elle ne peut nuire a vostre iugement,  
Dautant que la Vertu, qui loge dans vostre ame,  
La rend constente en vous, et sans nul changement.

Fin